

इवनिंग डोगरी न्यूज़ बुलेटिन

समे-18:15 Hrs

<><><><><><>

Headlines

- 1 लोकसभा चुनां दे 7में ते अखीरले चरण लेई मतदान दी प्रक्रिया अज्ज सम्पन्न होई गई। संझा 5 बजे तगर 58 प्रतिशत मतदान दर्ज कीता गेआ ऐ।
- 2 पाकिस्तान सरकार नै इस्लामाबाद हाईकोर्ट च एह कबूल कीता ऐ जे पाकिस्तान दे कब्जे आहला कश्मीर इक्क विदेशी इलाका ऐ।
- 3 सरकारै अमरनाथ जातरा लेई सब्बै तैयारियां मुकम्मल करी लैतियां न, 57 अफसरें दी तैनाती अमरनाथ जी दी पवित्र गुफा आहले रस्ते पर कीती गई ऐ।
- 4 भाला सुट्टने दे मुकाबले च भारतीय खडारी डी.पी मन्नु होरें ताइबान-एथलेटिक्स ओपन 2024 च सुन्ने दा तगमा हासिल कीता ऐ।
- 5 जम्मू च गर्मी दा प्रकोप जारी माहिरें लोकें गी दपैहरी दी तेज धुप च घरां बाहर नेई निकलने दी चेतावनी दिती ऐ।

<><><><><><>

7th Phase Voting

लोकसभा दे 7में ते अखीरले चरण दे चुनां तैहत 7 राज्यें ते 1 केंद्र शासित प्रदेशें दिएं 57 संसदीय सीटें लेई अज्ज वोट पाए जा करदे न। इंदे च वाराणसी संसदीय सीट बी शामिल ऐ जित्थुआं प्रधानमंत्री नरेंद्र मोदी होर चुनां लड़ा करदे न। पंजाब दिएं 13 सीटें, हिमाचल प्रदेश दिएं 4, उत्तर प्रदेश दिएं 13, पच्छिम बंगाल दिएं 6, बिहार दिएं 8, ओडिशा दिएं 6, झारखंड दिएं 3 ते चंडीगढ़ दी 1 सीट लेई अज्ज मतदान होआ करदा ऐ। एहदे अलावा ओडिशा दिएं 42 असंबली सीटें ते हिमाचल प्रदेश दिएं 6 असंबली सीटें लेई बी अज्ज गै वोट पाए जा रदे न। 10 करोड़ 6 लक्ख शा मते योग्य मतदाता इस चरण च चुनां मैदान च खड़ोते दे कुल 904 मेदवारें दे सियासी भविक्ख दा फैसला अज्ज करै करदे न। खीरी जानकारी थोने तगर संझा 5 बजे तगर 58 प्रतिशत मतदान दर्ज करी लैता गेदा हा। एहदे शा पैहले प्रधानमंत्री ते बीजेपी दे वरिष्ठ नेता नरेंद्र मोदी होरें लोकें गी अपील कीती जे ओह बधी चढ़ियै लोकतंत्र दे इस महापर्व च शामिल होन ते पक्क गै मतदान करन। उनें मेद जाहिर कीती जे महिला ते युवा मतदाता रिकार्ड गिनतरी च वोट पाने दे अपने हक्का दा इस्तेमाल करडन। श्री मोदी होरें लोकें गी गुजारश कीती ऐ जे ओह मतदान दे राहें भारत दे लोकतंत्र गी मता मजबूत ते समृद्ध बनान।

<><><><><><><>

LG-Vote

उपराज्यपाल मनोज सिन्हा होंरें अज्ज उत्तर प्रदेश दी बल्लिया चुनावी हल्के दे महानपुर गां थमां अपना वोट पाया ऐ। एल.जी होंरें सोशल नेटवर्किंग साईट-एक्स राएं लोकें गी अपने वोट पाने दे अधिकार दा इस्तेमाल करने ते लोकतंत्र गी मजबूत बनाने दे कम्म च बधी चढ़िये अगगे औने दी अपील बी कीती।

<><><><><><>

Pakistan-POJK

पाकिस्तान सरकार नै इस्लामाबाद हाईकोर्ट च एह कबूल कीता ऐ जे पाकिस्तान दे कब्जे आहला जम्मू-कश्मीर इक विदेशी इलाका ऐ। पाकिस्तान दे अप्पर अजार्नी जनरल नै अदालत गी दस्सेया जे कश्मीरी शायर ते पत्रकार अहमद फरहद शाह पाकिस्तान दे कब्जे आहले कश्मीर चि हिरासत च न ते उनेंगी इस्लामाबाद हाई कोर्ट च पेश नेई कीता जाई सकदा की जे पाकिस्तान दे कब्जे आला इलाका विदेश जमीन ऐ ते ओह पाकिस्तान दे अख्तियार हेठ नेई ऐ। अदालतै च शाह हुंदी घरै आहली दी याचिका पर सुनवाई होआ करदी ही। शाह होंरें गी पाकिस्तान दी खूफिया एजेंसिएं रावलपिंडी च उंदे घरै थमां अगवाह करी लैता हा। शाह होर पिच्छले दऊं हफतें शा लापता न ते हाल च गै पता लग्गा ऐ जे पुलस नै पाकिस्तान दे नजैज कब्जे आले कश्मीर च उंदे खलाफ दऊं मामले दर्ज कीते न। इस्लामाबाद हाई कोर्ट नै पुच्छेया जेकर पाकिस्तान दे कब्जे आला कश्मीर विदेशी इलाका ऐ तां पाकिस्तानी फौज ते

रेंजर उत्थे किस चाल्ती पुज्जे। हाई कोर्ट दे जज मोहसिन अख्तर नै पाकिस्तानी एजेंसिएं दी सख्त निंदा बी कीती।

<><><><><><>

Reasi-Ban

जिला प्रशासन रियासी नै जम्मू-कश्मीर दे रियासी जिले दे पवित्र कटड़ा शैहर दी सब डिविजन च सब्बनें चाल्ती दे तम्बाकू उत्पादें दी बिक्री रखने ते उपयोग उप्पर प्रतिबंध लाई दिता ऐ। कटड़ा शैहर श्री माता वैष्णो देवी दा आधार शिविर ऐ ते हर बरे करोड़ें दी गिनतरी च लोक इत्थे मत्था टेकन औंदे न। एहदे बारे गल्ल करदे होई रियासी दे डिप्टी कमिशनर विशेष पाल महाजन होरें गलाया।

<><><><><><>

Baramula

पुलस नै बारामूला जिले च इस बरे दे पैहले 5 म्हीने दौरान नशीले पदार्थें दी रोकथाम सरबन्धी कनून तैहत 44 बड्डे बदनाम तस्करें सने 17 ड्रग तस्करें गी गिरफ्तार कीता ऐ ते 51 इशारिया 62 करोड़ रपे दे मादक पदार्थ बरामद कीते न। पुलस नै गलाया ऐ जे इस्सै अवधि दौरान नशीले पदार्थ दी तस्करी करने आहले 16 कुख्यात तस्करें दी 5 इशारिया 5 करोड़ रपे दी संपत्ति बी कुर्क कीती गई ऐ ते 95 नशा तस्करें उप्पर एन.डी.पी.एस कनून तैहत ते मामला दर्ज कीता गेआ ऐ।

<><><><><><>

Machail-Yatra

किश्तवाड़ जिला प्रशासन नै औंदी मचेल यात्रा लेई लोड़चदे सब्बनें प्रबंधे गी मुकदा रूप देई दिता ऐ। किश्तवाड़ दे डिप्टी कमिशनर डॉ. देवांश यादव होरें स्हाड़े जिला संवाददाता हुंदे कन्ने गल्ल करदे होई गलाया।

<><><><><><><>

Amarnath-Yatra

केंद्र शासित प्रदेश जम्मू-कश्मीर दी सरकार सुरक्षा एजेंसियां ते होर दुए सरबंधत धड़े 29 जून गी शुरू होने आहली श्री अमरनाथ जात्रा लेई पूरे जोरें-शोरें कन्ने तैयारियां करा रदे न। जम्मू-कश्मीर सरकार नै इस बरे दी श्री अमरनाथ जात्रा लेई जम्मू-कश्मीर प्रशासनिक सेवा जे.के.ए.एस दे 57 अफसरें गी बतौर कैंप डरैक्टरस ते अडिशनल कैंप डरैक्टर तैनात कीता ऐ। तोआई जात्रा गी यात्रुएं लेई रमानदारी आहला बनाने लेई राष्ट्रीय आपदा प्रतिक्रिया बल एन.डी.आर.एफ नै चंगी चाल्ली प्रशिक्षित अपने 00 जवानें जिंदे च महिला सैनिक बी शामिल न गी पिछले ढाई महीने थमां उधमपुर च लोड़चदी सिखलाई देआ रदा ऐ। स्हाड़े उधमपुर आहले संवाददाता अचिन दुबे हुंदे कन्ने गल्ल करदे होई असिस्टेंट कमांडेंट प्रवीन सिंह होरें अमरनाथ जात्रा दी तैयारियें बारै दस्सेया।

<><><><><><><>

Mindal-Yatra

तोआई डोडा दे डिप्टी कमिशनर हरविंद्र सिंह हों हरे बरे जून म्हीने हिमाचल च शुरु होने आहली मिंधल माता जातरा गी डोडा जिले थमां झंडी दस्सियै रवाना कीता। स्हाड़े डोडा आहले संवाददाता हों जानकारी दिती ऐ जे सांस्कृतिक ते धार्मिक आस्था कन्ने जुड़ी दी इस जातरा च श्रद्धालु मिंधल माता दे दर्शन गितै दूरां-दूरां थमां औंदे न। जातरा लेई सुरक्षा दे सख्त इंतजाम कीते गेदे न। हिमाचल प्रदेश च स्थित मिंदल माता दे मंदरै च यात्रु किश्तवाड़ दे राएं औंदे न। डोडा दे इलावा एह जातरा भद्रवाह, जम्मू ते किश्तवाड़ थमां बी शुरु हुंदी ऐ।



Poonch

पुंछ जिले दे कवायली जनजातीय आबादी गी सहूलत दिंदे होई बकरवाल परिवारें ते उंदे माल बच्छें गी लेइये जाने आहली 7 गड्डियां अज्ज श्रीनगर लेई रवाना होइयां। पुंछ च रौहने आहला एह परिवार पारंपरिक तोरा उप्पर अपने माल बच्छें गी चराने लेई हरे गर्मियें च कश्मीर दी उच्चियें चरगाहें च चली जंदे न। मौसम दे स्हाबै ठंडे इलाकें शा गर्म इलाकें जां फही गर्म शा ठंडे इलाके जाना इनें कवायली जनजातीय परिवारें दी बुनियादी लोड़ ऐ। एदे राएं गै उंदा जीन सखल्ला होई पांदा ऐ। स्हाड़े पुंछ दे संवादादाता कन्ने गल्ल करदे होई जिला जनजातीय अधिकारी अब्दुल रहीम ते इक्क कवायली फतेह मोड़ नै आखेआ।

<><><><><><><>

Javelin

भाला सुट्टने दे मुकाबले च भारत दे डी.पी मनु नै ताईवान एथलेटिक्स ओपन 2024 च अज्ज 81 इशारिया 5-8 मीअर दी दूरी तगर भाल सुट्टियै सुन्ने दा तगमा हासल कीता ऐ। 81 इशारिया 5-8 मीटर दे इस शानदार प्रदर्शन कन्ने डी.पी मनु होर पैहली थाहरै पर रेय। चीन दे चाओ सुन चेंग नै चांदी दा तगमा जित्तेआ जिसलै के चीन दे गै चाओ हांग हुआंग नै 71 इशारिया 2-4 मीटर दी दूरी पर भाला सुट्टियै केंह दा तगमा अपने नां कीता। इस मुकाबले च हिस्सा लैने आले कुल 12 प्रतिभागिएं चा भारत दे डी.पी मनु गै इक्कलै विदेशी प्रतिभागी हे। उआं डी.पी मनु लेई अजें बी पेरिस ओलंपिक लेई अपने आप क्वालीफाई करने गितै 85 इशारिया 5-0 मीटर दा निशाना हासल करना अजें बकाया ऐ।

<><><><><><><>

Weather

मौसम विभाग नै आखेआ ऐ जे जम्मू संभाग च बने दे जबरदस्त गर्मी आले हालात अगले किश दिनें दौरान बराबर जारी रौहने दे असार न। जम्मू च अज्ज दिनें दा बदोबद तापमान 42.9 डिग्री सैल्यिस ते कल रातीं दा घट्टोघट्ट तापमान 30.1 डिग्री सैल्यिस दर्ज कीता गेआ। पैहले जारी कीती गेदी सलाह गी फही दोहरांदे होई मौसम विभाग नै आखेआ ऐ जे इनें दिनें वायुमंडल च यू.वी रेडीएशन दी तीव्रता बड़ी

मती ऐ इस करियै दपैहरी 12 बजे शां 3 बजे तगर बाहर जाने कोला परहेज करना लोड़चदा ऐ। मैहकमे नै लोकेँ गी एह सलाह बी दिती ऐ जे ओह मता जरूरी होने पर गै दिन दे बेल्ले बाहर निलन ते बाहर जाने आस्तै हल्के रंगेँ दे टल्ले लान ते पान दी बोतल बी पक्क गै कन्नै रक्खन।

